

**Media Disaran Terus Bantu Kerajaan Bangunkan Negara
Bernama
27 Disember, 2011**

MELAKA, 27 Dis (Bernama) -- Ketua Menteri Melaka Datuk Seri Mohd Ali Rustam memuji media di negara ini kerana masih berpegang teguh kepada etika kewartawanan dalam penyebaran berita, khususnya berkaitan dasar kerajaan.

Katanya media memainkan peranan penting dan harus terus menjadi penghubung antara rakyat dan kerajaan bagi memastikan negara dapat terus dibangunkan dengan pesat.

"Saya percaya media tempatan sama ada cetak atau elektronik akan terus melaksanakan peranan dan agenda tersebut seperti yang dituntut oleh pembaca, pendengar dan penonton," katanya pada Malam Media Perdana Melaka 2011, di sini.

Antara tetamu pada majlis itu ialah Yang Dipertua Negeri Melaka Tun Mohd Khalil Yaakob, Speaker Dewan Undangan Negeri Melaka Datuk Wira Othman Muhamad dan Setiausaha Kerajaan Negeri Datuk Wira Omar Kaseh.

Turut hadir Timbalan Ketua Pengarang Pertubuhan Berita Nasional Malaysia (Bernama) Datuk Zulkefli Salleh.

Mohd Ali berkata sebagai rakan kongsi dalam pembangunan negara, media tempatan tidak harus mengamalkan pemberitaan secara sensasi bagi menarik pembaca, pendengar atau penonton seperti media barat.

Sementara itu mengulas isu berlainan, Mohd Ali berkata Barisan Nasional (BN) Melaka telah bersedia menghadapi pilihan raya umum ke-13 akan datang.

"Kita bersedia membuka bilik gerakan dan menggerakkan jentera pilihan raya pada bila-bila masa, jika tarikh pilihan raya diumumkan oleh Suruhanjaya Pilihan Raya.

"Saya yakin dengan semangat dan komitmen bekerja sebagai satu pasukan oleh jentera parti serta tanpa unsur sabotaj antara sesama ahli, beberapa kawasan pembangkang akan dapat ditawan oleh BN pada pilihan raya akan datang," katanya.

Beliau bagaimanapun berkata masih terlalu awal untuk memperkatakan soal calon dan kawasan yang akan ditandingi mereka.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=636547>